

Prins Carnaval 1956 ta na caminda

ORANJESTAD.— A tarda hopi promer cu comision carnavalista 1955 a dicidi di tene un reunion pa por a scohe un comision 1956. Pero mehor laat cu nunca. Kico ta e motibo di esey nos no sabi pero si nos sa cu e tar-danza y e sistema stranjo cual nan a usa pa invita pa e reunion di diamars casj a pone nos keda cu gana di weita un carnaval es anja aki.

Casi nos a bisa pasobra danki Dios pa e directiva cu nan a scohe cu lo no spaar tempo pa haci tur lo-ke nan por den e poco dianan cu nan tin. „Nos lo zorg pa es anja aki e carnaval bai mas mehor cu anja pasa” segun e president nobo di e comision, Senjor E. Arends, a bisa den su discurso cu el a tene despues di e eleccion.

Cu ta solamente diezdos hende a tuma caminda pa Tivoliclub diamars anochi por gradici e hecho cu e invitacion a worde manda te dialuna anochi anto solamente na tur e dos emisora di radio pa transmiti. Casi sigur cu e invitacion a bai normal-mente pa carta lo tabata mas mehor. Pero cu tempo ta pasa liher comi-sion 1955 tambe a canstata cu mie-do.

En todo caso tabata mashar stranjo y jammer cu den e seis club-nan cu a haci uso di e invitacion cual nan ta Caribe Club, Comman-deursbaaclub, Aruba Social Club, Tivoli Club y Rio Club no tabatin ningun di San Nicolas.

Eleccion.

A dura basta ora durante di e reu-nion promer nan por a dicidi con e comision di es anja aki lo sali esta

kier meen cu nan no por a bini cla kende y con nan mester pone den e directiva.

Algun di e presente tabata pro pa e comision bieuw mes tuma e orga-nizacion trobe segun e experencia di anja pasa con tur cos a bai bon y den poco tempo. Como cu dos di e miembronan di comision 1955 no kier a keda candidato a keda dicidi cu for di esnan cu ta presente un president un secretario y un tesorero lo worde escohi. Di esnan cu tabata presente a duna nan mes como can-didato pa president Senjor E. Arends, Dominico Croes y Milo Croes.

Despues di a vota Sr. E. Arends a keda nombra como president, Sr. Dominico Croes vice-president y Mi-lo Croes tesorero. Di e otro clubnan a ofrece nan mes pa tuma parti den directiva, Senjores F. Geerman, Hu-
(Sigui leza riba pag. 4)

Prins Carnaval 1956

(continuacion di pag. 3)

bert Arends, H. van Ierland, J. Croes y C. Lacle. Senjores Tom Quinn y Vic Schlutz lo keda mescos cu anja pasa avisador. Den dlanan venidero e comision lo hanja algun miembro mas di otro clubnan. Asina tambe sin duda representantenan di Caribe Club y Rio Club lo worde agrega na e comision pronto.

Despues cu e presentenan cu no tin puesto mas den e comision nobo a aleha nan, comision nobo a cumenza cu nan reunion mes ora pa cumenza cu e programa y haciele mas grandi cu ta posibel.

Na promer lugar nan a cumenza cu scohe e presidentnan pa sub-comité y a resulta Sr. Hubert Arends pa comision di parada, F. Geerman pa comision di material y adorno y M. Croes pa propaganda y publicidad.

Prins di Carnaval y su Pancho

Segun nos a worde informa cu es anja aki tambe nan kier pa e fiesta di Carnaval worde celebra henter nos isla. Na promer lugar un prins di Carnaval lo worde escohi dia 25 di Januari y pa esey tur club riba nos isla lo hanja un invitacion pa scohe dos hacido di pret como candidato.

Un reina pa Aruba.

Tambe lo tin es anja aki un reina di carnaval, cual lo worde escohi den e reinanan di tur es clubnan, pero es anja aki e coronacion lo worde teni den Wilhelmina stadion en vez di na Lago Heights pa no resulta manera anja pasa. Segun nos lectornan por corda cu anja pasa e reina a worde grita y chercha pa motibo cu un gran parti di e publico no ta-

bata di acuerdo cu decision di e hueznan.

Como cu mester palabra cu e directiva di A.V.B. ainda no ta segur cu e coronacion por tuma parti dia 11 di Februari pero esey ta casi sigur.

Alo largo e parada.

Naturalmente cu e parada 1956 cu tabatin anja pasa lo no ta di falta riba e programa. Diadomingo dia 12 di Februari tras merdia pa tres or parada lo worde teni. Como cu ta Hubert Salas tin e organizacion di e optocht na su encargo nos no tin mester di duda pasobra lo ta un optocht di kita sombre.

Ta verdad cu a cumenza laat pero e tempo ta suficiente pa cu poco cooperacion e carnaval lo por resulta mashar grandioso.

Tur hende mester yuda y coopera pa logra de lo mehor.